



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

South Africa nung prangbong bona alirtemi nisung toku khaset

Australia-i Test ana asayatsü anunga lia Ashes kokogo

VOL. XXIII ISSUE NO. 76 (ADOK 76) DIMAPUR TENTONÜ (MONDAY) LUCHII (DECEMBER) 22, 2025

₹ 5.00

VB-G RAM G ajanga MGNREGA melenzüker

Guwahati, December 21, 2025

(Agencies): President Droupadi Murmu-i Viksit Bharat-Guarantee for Rozgar and Ajeevika Mission (Gramin) (VB-G RAM G) Bill, 2025 agizükogo.

President Murmu-i VB-G RAM G Bill agizükba ajanga küm 20 tema benshia aruba Mahatma Gandhi National Rural Employment Guarantee Act (MGNREGA) agienogo.

Centre sorkari Viksit Bharat 2047 roadmap den liromedemba ozüng tasen yangluba ajanga MGNREGA agienor.

Iba ozüng tasen nung legal employment guarantee ulushia lir aser financial year ka nung yimtsüngtem nung aliba kilen shia atema mapa inyakba anogo 100 nungi 125 kümstür. Centre sorkari iba temelenshi ajanga workers' rights akangshir ta ashir. Tesüiba nung anogo 100 aliba ya true minimum guarantee masü saka ceiling ka ama dang benshia aru ta parnok i ashir.

MGNREGA kübok Centre-i dang full wage cost agütsü saka tang ozüng tasenba ajanga Centre aser state temi senotsü yaritepa agütsüsü.

VB-G RAM G Bill kübok linük ajungalen 60:40 Centre-State ratio kasa dang asütsü. Tesüiba nungbo formula balala liasü aser itemji northeastern aser Himalayan states atema 90:10 aser tangalen 75:25 liasü, ajisiüaka

tangbo 60:40 ratio asütsü.

Viksit Bharat-Gramin Rojgar Aur Aajeevika Mission (Gramin) Guarantee Bill, 2025 ya Parliament nung house anaprong agizükba sülen Deobarnü President Murmu-ia agizükogo.

Parliament nung opposition-i magizükaka iba bill ya agizüka liasü. Iba bill atema o atsütepa jembidang Rural Development Minister Shivraj Singh Chauhan-ibo Congress dang Mahatma Gandhi tesayuba ashioxtsü ta tai tonglokja liasü.

Modi'er sorkaribo Mahatma Gandhi tesayubatem taküm küma lidaktsür saka Congress-i ashioxtsür ta Chauhan-i ashir.

Centre sorkari bill tasen ajanga MGNREGA scheme melener aser iba nungi Mahatma Gandhi tenüng agiener ta opposition-i aitsü.

Ajisüaka Minister Shivraj Singh Chauhan-i iba bill tasen ajanga rural development aser employment tajungba kümdaktsür ta metena jembia liasü.

Iba ozüng tasen ya Viksit Bharat 2047 den putepa yangluogo ta Union Ministry of Rural Development-i ashir.

Centre sorkari iba ozüng tasen ya April 1, 2026 nungi mapa küma tenzüknür aser iba ajanga rural India nung employment guarantee putu tasen ka tenzüksü aser kibong crore aika ajangzüksü imlar.

PM Modi-i Assam Agitation nung asürtem tushi

Guwahati, December 21, 2025

(Agencies): December 2, 2025 nü Prime Minister Narendra Modi-i Swahid Smarak Kshetra nung Assam Agitation mapang taküm bendanga agütsür nem tetushi agütsüogo.

Iba movement ajanga Assam nung yimtenren aser lokti inyakim melenshia liasü ta PM Modi-i ashir.

Assam nung küm trok tashi anti-foreigners' movement agidang nisung 860 taküm sama aser iba movement ya 1985 nung tembanga liasü. Assam Movement nung tasürtem nem tetushi agüja Swahid Smarak Kshetra yangluba lir.

Assam Chief Minister Himanta Biswa Sarma den tongti ketdangsürtemi meina Prime Minister Modi-i tanü martyrs' gallery sema senzü. Paisa Khargeswar Talukdar kürakyanglu nung naro enoktsü. Assam movement nung mezüngbuba taküm bendanga agütsüsang Khargeswar liasü aser pa December 10, 1979 nü asü.

Iba nüngshilung ya Rs 170 crore endoka yanglu aser water bodies, auditorium, prayer hall, cycle track aser sound-and-light show atema facilities lir ta ketdangsürtemi ashir.

PM Modi-i semdangba ajanga Centre-i Assam movement senmang wazüka ayutsü

temulung agütsüba sayur.

Deobarnü PM Modi-isa Brahmaputra ayong nung cruise ka nung mener kaketshirtem den ajurutepa sensaksemogo.

'Pariksha Pe Charcha' kübok pai school tanurtem den minute 45 shi ajurutepa sensaksema liasü.

Brahmaputra ayong manung three-deck vessel M V Charaidev 2 nung pai kaketshir 25 den ajurutepe. Kaketshirtem ya Assam kübok tesem balala nungi shimtetbapurtem liasü.

Iba mapang river police, National Disaster Response Force aser State Disaster Response Force ajanga security akanga anük.

Kamrup Metropolitan, Morigaon, Dibrugarh, Cachar, Baksa, Dima Hasao, Kokrajhar, Golaghat, Karbi Anglong aser Nalbari nungi kaketshirtem shimteta liasü. Parnok ya government, residential aser Jawahar Navodaya Vidyalayas, Kendriya Vidyalayas, PM Shri schools, Kasturba Gandhi Balika Vidyalayas, Assam Jatiya Bidyalay o Don Bosco amala nija rejutem nung azüngertem lir.

Prime Minister Modi-i river cruise asüba ajanga Assam nung river tourism ajungkettsüogo ta CM Sarma-i metetdaksü.

'Pariksha Pe Charcha' ya 2018 küm tenzüka lir aser iba

sentong ya kümshia agia arur.

"Ni chawala ka lir aser ni süngolu nung inyakertem khuret mangatetra, shibai parnok asoshi bilemstütsü" ta PM Modi-i tanü ashir.

Namrup nung Ammonia-Urea Fertiliser Plant yanglutsü atema lung azünga yutsüdang pai iba olen jembi.

"Süngolu nung inyakertem ya Assam nung küm aika liyonga arur aser tesüiba Congress sorkartemi parnok nem ali temetentem magütsü aser senzüka yutsü. Saka onoki süngolu nung inyakertem asoshi bilemstür aser parnok nem ali temetentem agütsüogo. Tang nungi parnok taküm jenjang keta alitsü" ta paisa ashir.

"Congress-i vote-bank politics atema ozüng alema arurtem pusemer aser parnok dak mapa inyakba anema noktaker. Congress-i SIR maparen lutsür aser iba ya ozüng alema arurtem kümzüksü aser vote bank akangshitsü atema lir" ta Prime Minister Modi-isa ashir.

"Congress-i linük anema inyakertem teti onoki inyakba mapatem aitsür. Tang parnok vote-bank politics atema ozüng alema aruba Bangladeshi nung yarir, saka BJP-i ozüng alema aruba anema akangkanga noktaker ta ni nenok dang nangzüker" ta paisa shisem.

Christmas indang chichiba tetezüji temeim lir: Kiyevi I. Swu

Dimapur, December 21, 2025

(TYO): Christmas indang chichiba tetezüji temeim lir anungji asenok tsüngda temeimtep nung aser kati ka yaritepa alitsüsa ta Dy. Director, Dept. of Food & Civil Supplies Kiyevi I. Swu-i ashir.

Pai iba tayongzükbä ya Dimapur kübok United Colony, Ward-20 nung anogo asemnü Christmas Carnival tembangba sentong nung jembidang agütsü.

"Christmas tonga arudang asenoki Yohan 3:16 nung Tsüngremi asenok kanga meimba aser asen temenen pongdoktsü asoshi pa ajaso chir yokba bilemtetdi. Christmas indang chichiba tetezüji temeim lir anungji tesentepertemi maneni meimteptsü aser kati ka yaritepa ayongzüker" ta Kiyevi-isa ashir.

1st United Colony Christmas Carnival 2025 ya Deobar nikongdang tembanga liasü aser iba sentong nung alakteta jaokerji Kiyevi liasü aser pai colony tenüng nung ashiba ama nübortem amalitepa aser longjema alitsü ayongzüker.



December 19, 2025 nungi 1st United Colony Christmas Carnival 2025 tenzüker aser anogo aemnü nung stall balala lapokba den Aloba Naga, Afrikan Amakshiu, Shujan De aser anogo nüngtugu nisung aikati shilem agia liasü.

Mezüng anogo nung Christmas Carol tetoktepba agi aser iba nung 'Jolly & friends' ajanga mezüngbuba jenjang aser

'The Clique' ajanga tanabuba jenjang takoktem angu.

Tanabuba anogo nung Talent Competition agi aser idangji Yimesen-i mezüngbuba jenjang aser Moasenla-i tanabuba jenjang takoktem ngua liasü. Iba tetoktepa ana atema senpetji Rs. 15,000 liasü.

Deobarnü Chief Patron, Ameto Peseyie, MD, Progressive Motors-i o jembidang pa colony

nung ainba bilemteta lemsatet.

Iba colony nung temenungratsü aika lir saka küm aika gari lenmang aser kilentzü ayimdak kanga mejungi aliba angudang temulung raksar ta pai ashir.

United Colony nung tongtipang lenmangtem süia lir aser tanü traffic paitoktsü atema item lenmang ya kanga tongtipang süia amshir anungji

sorkari nübortem timtem angateta repringdaksünür ta Ameto Peseyie-isa ashir.

Iba sentong nung G.H.S.S., Athibung Principal Chichano Ngullie-i tesentepertem pelaa agizük aser AG School Principal David Ngullie-i temoatsü meshia sarasadem.

Sentong nung Moalemla Aier aser Dr. Kambo Arkha na hosts liasü aser Organizing Committee Convener Achiba Ozukum-i anküp tepela o jembi.

1st United Colony Christmas Carnival 2025 tanabuba anogo nung Chief Patron ji DMC Councillor, Ward-20 Lanuchuba Imchen aser alakteta jaokerji Senior Principal, GHSS, United Colony Karen Yeptthomi liasü.

United Colony Council aser Organizing Committee ajanga carnival-i arur ajak dang pelaba metetdaksüogo.

Parnokisa stall kiburtem, artists, shilem agirtem, service providers, kiyongertem aser supporting teams ajak dang pelaba shisem.

Team Better Dimapur nem A Kevichusa Citizenship Award 2025 agütsü



Team Better Dimapur-i A Kevichusa Citizenship Award 2025 agizükba sülen tangokba noksa ka yangi angur.

Dimapur, Luchii/December 21 (TYO): Dimapur nung Honibarnü sentong ka agidang Team Better Dimapur nem A Kevichusa Citizenship Award (KCA) 2025 agüja liasü.

Lipokienla Walling nem Chalie Kevichusa Essay Award 2025 (Youth Category) agütsü, shiba nem senpet sen 30,000 den kulizüng kaket ka agütsü aser Ketshunuo Luna nem honourable mention agütsü.

Senior category nung iba sempet ya Boka K Rochill nem agütsü, shibai senpet sen 50,000 den kulizüng kaket ka ngua liasü. Rochill-i Earth Alliance Nagaland nem iba senpet sen shilem 20 agütsütsü ta sangdong. Iba category nung Keneisetsonuo Chatsu nem honourable mention agüja liasü.

Taküm essay competition ya 'The Role and Responsibility of Citizens in Caring for Their City/Town/Village: Moral Obligations and Practical Solutions' omen nung agia liasü.

Sentong akhumdong ka ama Deputy Commissioner, Dimapur, Dr. Tinojongshi Chang-i jembidang, iba sentong ya lokti tejakleni aoba aser junga aliba tamendak dak benjong tajung ka lir, ta ashi.

Iba sempet ya mapa tajung inyakba junga agizükba kisüng

masü saka takum junga litetba ajanga maneni putu sa putu ajungmesor ta sayuba lir, ta pai ashi.

Senso tajung ta asüba ya 'legal identity' mesüra vote agütsütsü temeden kisüng masü, koba anogoshi inyaksangshiba, ochi ashiba, ozüng akumtsübobba aser dangar atema bilemba nunga sayur, ta pai ashi.

Nagaland ama kin balala aliba state ka nung, senso tajung kaji sobaliba aser tamangba yimsü balala nungi nüburtem alentepa ayuba temenatsü ka amai lir. Iba sempet angurtem ya senso tajung tatishitsü tajung lir, aser parnoki lokti tenzükb, shisaluyim, libajen wazüka ayuba aser yimjung adokdaksüba nung shilem agiba ajanga teti asoshi temelenshi alir aser nüburtem dang sayutsü memeranger, ta ashi.

Team Better Dimapur tir Mhonjan Humtsoe-i sempet agizükba sülen iba sentong ya par telok asoshi alizüng tongtipang ka lir ta ashi.

Par teloki yimti tebour ajungtsü asoshi küm aika meranga inyaka arudang, aiben taitsuba liasü, saka parnoki aremzüka inyakba nung tajangzük nguogo ta ashi.

Kinunger temi meyar asübo lokti-i mapa meinyaktetla, ta Humtsoe-i ashi. Teyari ama arogo ka nungi onok nem ita shia sen 5,000 agütsür aser onoki donations mebushir aser onok ket nung aliba rongsen dang amshir ta pai ashi.

KCA kübok anguba senpet sen 4 lakh ya amshia maneni Dimapur tebour jungdaksüba mapa inyaksü, ta pai metetdaksü aser nüburtem dang maitsüi yimti ajungtsü asoshi maneni inyaksü ayongzük.

Sentong nung Team Better Dimapur nungi Abeni Lotha-i par teloki mapa balala inyakba indang lemsatepa liasü.

2017 küm nungi Team Better Dimapur yagi teyari mapa, saisapong aser medical camps densema nübur tenzüka mapang balala inyaka arur.

Ajisüaka parnoki Dimapur tebour tajungba kumdaksütsü meranga inyakba indang ang tali jangjar.

Parnoki flowerbeds anepaluba nungi tenzüka dividers raksar aliba yanglushir aser nüburtemi amshiba tesemtem müreker, saka parnoki sempet mesüra konang nüngdang meimlai pei akokba lenmang nungi yaritepa inyaker.

NPF Zunheboto division jeli Christmas benjong amung

Dimapur, Luchii/Dimapur 21 (TYO): Naga People's Front (NPF), Zunheboto division pur jeli Christmas sentong Ayigha hall, Zunheboto NPF office nung December 20, 2025 nü agia party lenirtem, züngsemtem aser temulungertem lungjema benjong munga liasü.

NPF Zunheboto division tir Khehoshe Yepthomi-i Zunheboto district kübok party workers aser town council councilors tem den Christmas salem lemsatepa liasü.

Yisu Khrista asoba temaitsü Christmas ya amunger, koba ajanga nisung meimchir asoshi teimla, yimjung aser tekumzük bener arutsü, ta Yepthomi-i ashi.

Iba mongpu ajanga nüburtem dang temeim, ajemalu aser kati ka asoshi mapa tajung inyaksü atema bilemtsü ayongzüka liasü.

Christmas ya tatok agütsüba, telungjem aser tesunep asoshi asendenshiba mapang lir ta ashi.

Minister, Road & Bridges, G Kaito Aye lenisüba kübok

legislator pongu, district in-charge aser NPF Zunheboto division temi tenlaba ajanga iba benjongmung takok ngua ayongzük tetogo, ta pai ashi.

Zunheboto Town Council chairman Herato Sukhalu-i salem o jembidang NPF Zunheboto division ajanga tanen makai yaritepba asoshi tenünsang agütsü aser party dang maneni yariteptsü ayongzüka liasü.

Iba sentong nung Women Wing, NPF Zunheboto indang tatong tir Meritoli H Zhimo menden liasü aser Inavito Chishi, general secretary, NPF Zunheboto recorder liasü.

Ahoto Tuccu, working president, NPF Farmers' Wing ajanga sarasadema sentong tenzü, Lino Yeptho-i Lai azüng, Bovitolii Yeptho, secretary of Women Wing ajanga cake alem aser Ghokivi Awomi-i ken ka aten.

Sentong tembanga Marina Assumi, secretary, NPF Zunheboto ajanga sarasadema liasü.

AR-i Meluri aser Phek nung azü agütsü

Dimapur, Luchii/December 21 (TYO): Assam Rifles personnel temi nübur asoshi bendanga agütsür inyakba tejangja sayua December 21, 2025 nü Meluri aser Phek district nung azü unit pezü agüja liasü.

Meluri nung O positive azü unit ana Akhegwo yimtsüng nungi arishi küm 17 tain Yeedave nem agütsü, shiba post-partum haemorrhage agi shiranga liasü. Mapang shidak nung azü agütsüba ajanga tanur tetsüi kanga nüngdaka aliba

teyari ngua tang la temang kanga tajungba lir.

Phek nunga Assam Rifles temi azü O positive unit ana Phek village nungi arishi küm 65 tain Niekhtulu Keyho nem agüja liasü, shiba blood cancer agi shiranga lir. Iba tenla ya ajanga la azü kanga nüngdaka aliba nung teyari tulu ngua liasü. Shiranger kibong anaprongi sepaitem dang pelaba lemsatepa liasü.

Assam Rifles temi iba ama teyari agütsüba nüburtemia pelaba lemsatep.

Kikrüma Association Kohima hon jubilee mungogo



Kikrüma Association Kohima hon jubilee sentong nung Helievio Solo-i jembidang tangokba noksa nung angur.

Kohima, Luchii/December 21 (TYO): Kikrüma Association Kohima (KAK) hon jubilee sentong December 20, 2025 nü Capital Cultural Hall, Kohima nung munga liasü.

Sentong akhumdong Kohima Village Council (KVC) chairman Helievio Solo-i jembidang KAK küm 50 ajungba asoshi tenünsang agütsü aser parnok dak yimya tajung aliba tenünsang agütsü aser maneni dangar den yimjung nung alitsü ayongzüka liasü.

Kohima village aser Kikrüma village tsüngta mapang talangka nungi tesendaktep tajung nung aliba bilemteta, pai tarutsü putu tem

nunga tesendaktep tajungba nung alitsü ayongzük.

"Arok ajungtsü asoshi asen tetsü-tebou nunger tesendaktep tajung nung liasü aser asenoki maneni ibaji wazüka ayutsüla," ta pai ashi.

Paisa yimtsüng ana tsüngta tesendaktep tashi itshitsü atema Cultural Exchange mesüra Youth Exchange sentong amala tenzütsü ayongzüka liasü.

Nagaland Legislative Assembly (NLA) indang taoba speaker Thenucho Tunyi-i Kikrüma nüburtem dang tangatetba ylushitsü aser alima tesem balala nung mapa bushia inyaksü ayongzüka liasü.

ZT Slingshot ajanga "December" music video sayaogo



Dimapur, Luchii/December 21 (TYO): Naga nunger rap ken atener ZT Slingshot-i "December" nüngja agütsür Christmas music video tasen ka sayaogo.

Iba ken ajanga December ya tamang, telungjem aser asendenshiba mapang ka ama ashir, kong kinunger aser

yimtsür-yimertem tepela, temeim aser tenünsang agüja külemi amunger.

ZT Slingshot ya hip-hop ken aser sobaliba kenten-menü meyoktepa amshir kentener tejangja ka lir.

'December' ken ya Nestvibe Studio nung record

süa yanglu, koba Ket Meth-i yanglua liasü. Music video nung director Macnivil liasü aser cinematography ya Toshikokba Walling aser styling ya Assortments 2.0 liasü.

'December' music video ya YouTube <https://youtu.be/9ltBxDY9U2w> nung angutsü.



December 21, 2025 nü Thiruvananthapuram nung Kerala BJP Tir, Rajeev Chandrasekhar aser party lenir Prakash Javadekar na den tangartem Thiruvananthapuram Corporation local body nung züngsem tasenpurtem tenangzükba agiba sentong nung adenba noksa nung angur.

Centre-i J&K nem sen lemsüksüba atema Omar-i pelaba lemsatep



Srinagar, December 21 (Agencies): Jammu & Kashmir chief minister, Omar Abdullah-i Centre sorkari J&K nem senotsü lemsüksüba atema pelaba lemsatep, ajisüaka Centre sorkari J&K nem tanaben state jenjang magütsüba atema mepelaba lemsatep.

Omar-i, "Centre sorkari senotsü lemsüksüba atema pelaba ni lemsatepsü. Ni nisung ashiokja politics masayar. Kodangsa Centre-i teyari agütsüdir ni pelaba lemsateper, aser kodangsa metokmeperi lidir ni iba indangji jembir," ta metetdaksü.

Omar-i Delhi nung BJP pusemer saka Kashmir nungbo BJP aitsür, ta opposition lenirtemi pa nem tai

tongloktsüba dak sendakba nung tasüngdangba ka langzüdang pai, "Ni tangar ama masü, ni nisung ashiokja politics masayar," ta ashi.

Tawa New Delhi nung senden ka nung Omar-i, "Centre-i J&K nem senotsü agütsüba atema pelar, ajisüaka ni dang melungra par sorkar apudakdaksütsü," ta jembia liasü.

Iba dak sendakba nung Kashmir nung Opposition party temi, pai Delhi nung o balaka jembir aser Srinagar nungbo ano balaka jembir, ta aitsü.

"Ni kar peladaksütsü atema kecha mejembir. Ni Delhi nung o balaka aser Kashmir nung balaka mejembir. Union sorkari senotsü lemsüksüba atema ni ajaklen ibaji jembir. Lokti

senden, ketdangsertem den jembidang aser assembly nunga kasaji jembir," ta pai ashi.

Omar-i, J&K nem state jenjang tanaben magütsüba onük dak alaka Centre anema jembitsüsa tanga onük kecha mali, ta metetdaksü.

MGNREGA scheme melen G-RAM G Bill agizükba atema sorkar aija Omar-i, Centre sorkari senotsü aser ketdangsüba tsütsü khuret ajak state tem nem agütsür, ta aitsü.

Tamalen Omar Abdullah-isa 'Viksit Bharat-Guarantee for Rozgar and Ajeevika Mission (Gramin) mesüra VB-G RAM G ta ajaba bill aija, iba nüngja ya Bollywood film nüngja ka dang mesük, ta metetdakja liasü.

Paisa iba scheme nungi Mahatma Gandhi tenüng agienba atema sorkar aitsü.

Bangladesh nung aliba Indian Missions nung security akangshiogo

New Delhi, Luchii/ December 21 (Agencies): office longbangtsü amokmerena liasü.

Tawa Bangladesh nung lanur lenir, Sharif Osman Hadi khasetba sülen tensa ano tamajungba dang akümba agi Indian Assistant High Commission office aser Bangladesh kübok Sylhet nung aliba visa application centre nung security akangshiogo, ta osang ka ajanga metetdaksü.

Sylhet Metropolitan Police Additional Deputy Commissioner (Media), Saiful Islam-i, telok tasembuba ka nem tensa meraksadaksütsü nükjiding nung security akangshiogo, ta metetdaksü.

Hokolbarnep nungi Upashashar nung aliba Assistant High Commission office aser Assistant High Commissioner ki aser Shobhanighat area nung aliba visa application centre nung security akangshiogo, ta police-i metetdaksü.

Iba dak alia aonung piyong security sepaitem nem mapa lemsüksür.

Brihostibarnü Hadi asüba sülen Gano Odhikar Parishad-i Assistant High Commission

Yaküm August ita nung Hadi leniba nung Bangladesh nung Ato kilonser Sheikh Hasina-i aniba sorkar atsüngdoka liasü. Taküm December 12 nü mejangjaba nisung kari Bangladesh yimtiba, Dhaka kübok Bijoynagar kiyong nung election nüboyim sentong ka nung Hadi dak tekolak nung injang khaloktsü. Pa Singapore-i anir oa treatment tagidak mapang süogo.

Indian mission nung inyakertem shinga meyiru aser India o Bangladesh na tsüngda maneni tongtepratepa inyaksangshidar.

Hadi asüba sülen Bangladesh tesem aika nung longkak aita tensa mejungi aküm. Arrshi küm 32, Hadi tasümaning Honibarnü Dhaka University mosque anasa remsüogo.

Asüpila sentong nungji nisung meyirjang aika aden. Parnoki India anema "Delhi asü Dhaka - Dhaka, Dhaka" aser "Adianu Hadi azü tokshibaji amajokbo masütsü" ta yimyim ayima liasü.



December 21, 2025 nü Puducherry nung BJP National Working President Nitin Nabin, Puducherry Home Minister Arumugam Namassivayam, state BJP president VP Ramalingam aser State BJP in-charge Nirmal Kumar Surana nungeri roadshow ka nung shilem agiba noksa nung angur.

KANGTSÜNG BAPTIST AROGO

1925 | **CENTENARY** | 2025

Benjongmang



Nüchi Yimyim

ANOGO
27TH - 28TH DECEMBER 2025

TESENTEPDAK
KANGTSÜNG

Iba sentong nung sensosanger aser anükapang ajak pelashishia jaoker.

Live stream video
reprangtetsü



@ KANGTSUNG BAPTIST CHURCH

O JEMBIITEM

Rev. Tamsü Jamir
Executive Secretary
Ao Baptist Arogo Mungdang,
Impur

Rev. Sentsashi
Senior Pastor
Kohima Ao Baptist Arogo

Rev. Jongpong Imsong
Pastor
East Dimapur Ao Baptist
Arogo

- CENTENARY SENTONG LAPOKTSÜ -

Dimapur Kangtsüng
Kaketshir Telungjem

- NÜNGSHILUNG MESHITETBA SENTONG -

Rev. Dr. Subo Nüngsang Jamir

- CENTENARY SENTONG SHIBANGTSÜ -

Kangtsüng Baptist Arogo
Youth Dept. & Christian
Education Dept.

Christmas ADMISSIONS OFFER

Starts 15th - 31st Dec 2025 **60% Off**

Join Nagaland Most Trusted Institute for NPSC

#5YEARS 58GOVT. EMPLOYEES



Become an Officer, Join our January 2026 Batch

Call for **NPSC 2026**
☎ +91 7005114715

EduVersity PLUS
CSE PREPARATION 2.0

📍 KOHIMA 📍 DIMAPUR | 📍 HOSTEL & LIBRARY IN CAMPUS



TIR YIMYIM YIMOBILEM (EDITRIAL)

DIMAPUR MONDAY, DECEMBER (LUCHII) 22, 2025

Mkg nung osangkaket mangutsü!

Nagaland nung kaketsi tenzükdak aser Naga nungertem rongnung mezüing tazüing temeteter adokdak aser Ao lima, Mokokchung district amenlokdak Mokokchung town nungbo tanü nungi sangküm küm 2026 January ita mezüing hopta piyong anogo shia adokba osangkaket kata mangutsü, kechiyong asenok nübortem rongnung osangkaket alemer mali. Ibaji asenok asoshi ano tebilemdangtsü tebilemtsü tapu ka asütsü. Tangar asoshiho anogo shia adokba osang kaketsi lema ayokba ya anogo shia sen aaba mapa tajung ka lir. Aji oda, Nagaland nung anogo shia adokba osangkaket teimbaka Dimapur nungi adoker aser Dimapur nungi Kohima anepdang shia 5:00 ako nungbo atonger, anungji Dimapur aser Kohima nungbo osangkaket azüingertem mesakdang osangkaket lema ayokertembo ghonda ka ana tsüingda sen noklang pezü-pongo kabo aar alir. Atangji, kari aika alemer saka karibo ishika dang alemer, anungji osangkaket shia sen kaka tajangzük lia alemba nungi "delivery charge" dena ita temer saruyonga aodangbo, anogo shia osangkaket alemer kati sen noklang ka danga aa nunga, ita nungbo sen meyirijang asem dak tali asütsü. Aji oda, Dimapur aser Kohima nungbo osangkaket alemer kati osangkaket ka dang masü saka osangkaket tapu ana asem alemer, anungji tajangzuka yamaji lir. Ibayongji, tangbo asen nisungia osangkaket lema ayokba mapa ya aikati meranga inyaker. Atangji, Mokokchung nungbo Mokokchung Times aser Ao Milen dak alaka, tanga osangkakettembo anepdang masü saka anüingdangang angur, anungji anepdang tangar mesakdang Mokokchung Times o Ao Milen na lemer kima mapa inyaka atatsü mesüra anüingdang school aser college senshia Dimapur len nungi atuba osangkaket alemtsü ta anogo anogo shia khen anabenka osangkaket lema ayokba mapa nungi aaba sen agi school aser tuition fee bo agütsütettsü, mesüra süoshi aser kidang chiyongtsü aser nüngdak oset karbo alitettsü mesüra küm ka nung aaba sen agi smart mobile phone set tajung ka alitettsü. Item ama mapa tila aser ayongayonga inyakba nungi aruba temoatsütem asenoki mebilemdanger aser mereprangteter saka mapa teinyaktsü maka ta bilema, asenok ajak, tanurtem aser tsüraburtem, a sen apua mobile recharge ser kecha meinyaki kazür. Shitakba agibo, anogo shia adokba osangkaket alemba mapa ya mapa teinyaktsü maka kidang amonger chitentsürtem mesüra kidang nungi school aser college-i aoertem inyaktsüba mapa tajung ka lir. Ajisüaka, tang yabo Mokokchung town asenok kidang semloka alirtem nem lemdaktsür, anungji tang yabo parnok ajak benjong sodi aoer asünungji, parnok meyipa maru tashi Mokokchung town nung 'Newspaper' mangutsü. Aji kodang bilemdangdir, asen kidang alirtemji küm piyong marura küm piyong osangkaket mangutsü. Atangji, osangkaketji tachitajemtsüka masü, anungji chiyongtsü kisüing atema alima nung taküm alirtem asoshi osangkaketji menüingdaktsüa akok, saka taküm alitsü asoshi chiyongertem asoshiho chiyonger külen mapa teinyaktsü aser temetetrüba aika adoker, anungji alima nung kechisa ataloker aser shirnoki kechi jembir aser kechi aginür, item ajakji meteta anidaktsü asoshi osangkakettem dang masü saka tanga kaketsiema bushia azünger. Aji oda, shirnoki anogo shia osangkaket azünger, parnok alima koma aoer meteter, anungji tokolok shisatsü aiener aser wainshin aser awashi nung tangar dang nungi temetetrba akümer. Item jagi aluyimba nunga, business inyakba nunga aser mapa inyaktsü bushiba nunga tangar ajateta oa lenmang tajung nguteta inyaker. Atangji, tanü osang kaketsi mazüingba dang masü saka osangkaket azüingertema kanga ajema kümdagi, anungji osangkakettembo kanga akoksar. Ajisüaka, osang kaketsiema yabo sen aatsü asoshi adoker masü saka nübortem den shisalemsatepnüba aser metetdaksünüba agi adoker, anungji osangkaket ishika dang adokyonga, tazüingbo melentepa aikati azüingtsü nung ta bilema adoker. Atangji, osangkaket adokertemia nisungtemi züingnüseta azüingtsüsa adoktsüla aser nübortemia osangkaket mulungsua alia azüingtsüla. Atangji, tanü 'online' putu nung aikati mobile screen nung dang website aser WhatsApp ajanga azünger. Ajisüaka, aji agi meperitsü, tagitsübo asen teka nung kaketsi amer azüingbajisa tajungba asütsü. Iba tangatetrba nung, sangküm küm nungibo Mokokchung town mepu shia nung asen nisungi osangkaket lema ayoktsü aser kibong shiai osangkaket kaka ananabosa agitsü imlar.

OLEMSABANG

"Manokshiba Lung"

~ Sakurepla Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Oja! Sakang -

Ashilai belemseta sen ishika bendenba den kinungertemi tera agütsüba tem bendener tanur asemji züingdaktsü. Tanurtem züingdaktsünüadang labo shirang danga tangar ama mozüki-i aotsüa mekoki liasü. Tetsü timtembaji tanur asemi reprangteta, parnok akok tashi nüngdak maliba nung sen meindok aser temeimer kari parnok nem agütsüba süoshi tejen aser oset balala agi parnok tenük sünger ali. Iba den Taochilai college temer kidangi arubaji anisüingzüksüba melena aonung tashi tila tanurtem nem tuition agütsü aser anepdang züingia saker la lesson azüingtsü aser ano tuition maneni anepdangjia college-i mao tashi agi. Yamaji, Taochila aser tenu anati tetsü kanga lenji arua tebu meliaka Tsüingrem tashikang kübok par pezüi kibong tongpang tulujü bener jaja. Anepdang ka college-i aotsü mapang atonger saka tetsü mejangba nungi mesak. Par asemi tanepbo tetsüya kanga belemba agi talangka mejanger alitsüa ta dang bilem. Par asem apusoa aodang tetsüi teti sarasademer yoker saka iba anepdangjibo odang mesakba agi, Taochilai tetsü taktangi la mesotsü ai saka tetsüi tangua mesashi yipden nung longdaker liasü. Lai tetsü temang nung kongshi nung la mangji joko mekongzuka oya liasü. Taochilai yakta dang tenu anaji jar kidanger aser kinungertem dang osang ashitsü yok. Ajisür kiyongertem kar arua mozüki-i tetsüi bener ao. Doctor mapang shitak nung ajurua tetsü temangji reprang nung, chiyongtsü junga mechii ani belem tali asüba den temulungjang tashitak kanga mejungi akümba agi la yamaji aküm ta putet. Tanur asem teyimla aser akhüm tetsü dang alinung tangu mesashi akümer nu ta par asem azüiteper ajaptzü tenzük. Kinungertemi kechi komaka süaka la kümzükanag ta doctor dang mepeshi. Mozü kar agir külen, ICU nung ghonda ishika ayutsü doctor-i ashidang, ajaki mulunga la dang kümzükerbo inyakang ta shir la ICU jagi yok. Aonung tepiyong tetsü tasü ama ondaka alidang, Taochila aser tenu anati Tsüingrem dak tamang kar sarasademba manen. Tasüingnepji pezü ako meta tetsü teka arakzuba doctor-i osang ashi aser ghonda ishika lir külen la saakogo ta ashi. Tepela nung tetsü den oa ajuruteptsü melena ali nung apudaker tanur asemi Tsüingrem nem tenüingsang agüja sarasadem. Iba anepdang shirnokisa par asem tepela nüktzü yima sarasademba angü, tenük nungi nüktzü malur shinga maliasü aser atangji chirnurtem tamangi Ashila nem Tsüingremi tanaben taküm shilua agütsüa ni ta Pa tenüing asang.

Taochi agi kümzük Ashila kodang tenük lapok, la anasa tanur asemji menürema noktaker liasü. Idangji lai ola tanemi Tsüingrem taochi agi lar pezü kümzükogoo ta ashi. Iba o angashia par asemi Tsüingrem nem tali tenüingsang agüja tetsü dang nemeter sarasadem. ICU nungi adoker ano mozüki nung anogo ishika mungar kidangi tajungba kümer shilang. Kinungertemi ajungshia tanurtemo joko jila balalai tazüing tatsüka lirbo senshitsü, anungji yimtaki arua alitsü ashidang Ashilai lar tasoyim menungraa yimtaki tsürabur den oa alitsü mulungtet. Hopta ishika lir kibong ajak yimtaki ao aser ki tila ka mesemer idakji ali. Khristmas aser New year benjong asünung par pezüa Tsüingremi küm piyong lar kibong len aniba asoshi tali tenüingsang agüja parnok ket nung tera alibaji kiyonger tasentem den, tetsü tebou na den aser kinungertem den lemsatapa benjongji süidaktsü. Tanur asem joko jila balalai senshitsü mapang atong. Par asemi tetsü kija toktsür aotsüi temulungi makoker saka par asemi Tsüingrem tetsü den lir, anungji pei tazüingba wadangi shilangtsü aser khenü anogo tetsü arishia alidanga, la akhüm nung parnok la tetsüing ali nunga majemshidaktsüi yaritsü ta nükla nung yur par asem yim nungi apusoa ao. Ashilar kibongi tepela aser timtem ajak nung Tsüingrem dak zep ta azüiter Pa tashikang kübok ajemalua aliba agi, anogo ka nungi ka ta Ashila aser chirnurtem madak Tsüingrem taochi aser temoatsü teti liasü. Yipru mopung tesashi arudang, an tetsüi techanu amokbang medem, Tsüingremi Ashilar kibong teti Pa temeim aser taochi akhümbok nung ayu. Alima nungbo meimchir aikati majuruba timtem tuoshi Ashilar kibongi ajuru saka lar kibongi Tsüingrem temeim mamadoki Pa dak temulung lemer aliba yong, tarutsü anogo nung lar kibong dangi tepela nüktzü aser temoatsü talubosa yoktsü Tsüingrem sentong liasü. Ashilai lar chir asem züingdaktsütsü asoshi lai alu tila ka ayim aser idakji tsük den aonsütsü balala tsünü. Aonsütsü balala alu nung adokba temji lai kidangi bener adoka ayok aser la alui maodangbo, tangar lui ayangi(hajira)sa ao. Lai sen kanga kümdanga amshi aser labo tera agi dang nüngdakba tem peritsü merang aser tanüingba sen ajakji lar chirnur asem nem bener yok. Saka tanur asemi tetsü khuret aser timtem metetba agi, parnok meranga azüingba nung takok tulu angu aser parnok azüingba reju balala nungi senotsü teyari jenti ngua par asem item teyari jagi züingyonga ao. Ibayongji tetsü nungi parnok sen kata magi saka tetsü nem bank account ka lapoktsü aser lai inyakba nungi anguba sen tem yangji rizüingdaktsü aser la taküm jiang taoba asünung kangabo mebelemi kidang kazütsü ajungshi. Ashila dang yamaji tanurtemi shiaka, la meranga inyakba taküm ka asünung, lai asentzü sena maneni inyak saka tanur asem den khenübo anisüingzuka külemi alitsü nükla nung yur lai la temangjia anepalua ali.

Pai ajak abensatsür Taochila aser tenu ana kidangi joko tazüingtsü ajak zünger tetsü den ajuruteptsü yongyaseta kidangi shilang. Iba aonung parnok külemi lungjemer Tsüingrem tenüing sanga parnok ajak anema Pa taochi agi ajuruteptsüba asoshi tenüingsang agüja sarasademer külen mejangtsü pei pei taktangi senshitsü lia, Ashilai tanur asem dang tongtibang o ka ashitsü khen arua menang ta ashi. Tashi angaa par asemji tetsü anasa atepzüng nung mener ojalai kechi o ka ashitsüba atang asür ya ta bilema amen. Idangji tetsüi la tebang lapoker ola tanep agi par pezüi mapang tatsüka tsüingda nung tepela, tejashi aser takotzü marok jenti menakdangogo aser item ajakji ajangshiba agi par pezü ano alima wadang aser tanelar wadang nunga tali dang ain ta ashi. Anungji item tatalokba aser ajangshiba ajak ya Tsüingrem sentong aser ano Pa temeim tali lar kibong nung jungkai adokba ka dang ta angatetdaksüba mapang ka liasü, anungji Laishiba nung shia aliba ama Mathi 6:14-15 "Kechiaser nisungtemi aibelenbatem nenoki parnok dang tokra, nenok kotaker Tebuia nenok dang atoktsü. Saka nenoki nisungtem dang parnok aibelenbatem metokra, nenok danga matoktsü." Ashilai tanurtem dang Lai o nung shia aliba ama, tebu parnok dak kanga mejungi inyak aser par kibong ayatai nung toktsür pabo kecha tai mali ama taküm tasen ka tenzuka tetsür tasen agi. Iba lima nungbo tebu inyakbaji tatok agütsütsüba khenyongi malang saka kechi komaka süaka Tsüingremibo parnok nem anogo shia Pa taochi agi meimchiri inyaksaba ajak nung tatok agütsür aser mangyangba aser obendangbaji Tsüingrem meyong. Anungji Tsüingrem tenüing nung tanur asemi tebu nem tatok agütsütsü lai mepishi aser tebu dangi oa tesendaktep tajung yanglutsü iba aonung tanurtem dang ashi.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran nung Khristan pongu 5 tepuokdak ayutsü obendang agütsü



Pastor Joseph Shahbazian, Nasser Navard Gol-Tapeh, Pastor Shahbazian kinüngtsü Lida aser Aida Najaflou nunger noksa nung angur.

December 20, 2025: Iran nunger Khristan pongu küm 10 dak tali tepuokdak ayutsü atema obendang agütsüogo; sarasademba, bapitsüba, Laishiba aser Khristan kakettem alemba atema parnok nem tai tonglochtsü.

Parnok anema obendangji October 21 nü agüja liasü ajisüaka December ita nung ang parnok nem iba osangji metetdachtsü.

Revolutionary Court of Tehran nem temepishiba ken o agütsütsü atema parnok nem anogo 20 züngzüksüogo.

Iran nunger Khristan pongu rongnungji pastor Joseph Shahbazian aser Nasser Navard Gol-Tapeh na densema lir. Tenabo tamalena küm 6 jail nung puoka liasü, iba sülen taküm February ita nung tanaben apu.

Mejangjaba tetsür ka den Pastor Shahbazian kinüngtsü Lida aser Aida Najaflou nungera puogo.

Article18 Director, Mansour Borji-i, "Mejangjaba Khristan ka densema Joseph, Nasser, Aida aser Lida nunger apuba ya Khristan yimsü benshiba atema apuba lir. Kuli kecha makai parnok ama

Khristan aika puogo," ta metetdachtsü.

Melungtet telok Article 18-i ashiba agi, Lida dak alaka tanüngba Khristan pezüji küm 10 dak tali tepuokdak ayutsü. Najaflou aser Gol-Tapeh nabo dollar sen 130,000 aser 250,000 ajanga bail nung chioktsü akok.

Arrshi küm 44 Aida Najaflou apuba sülen labo temang nung timtem aika adokogo. La tongtired yirua aliba agi temang kanga ayangashir. Taküm October 31 nü la Tehran nung aliba Evin jail nung yipten nungi tsükba mapang tongtired yirua liasü.

Chhattisgarh nung Khristan ka tasü mang arongtsü takhangba agütsü

December 21, 2025: December 17, 2025 nü Chhattisgarh state kübok Kanker district nung aliba yim ka nung lokti kati tribal Khristanem amakba den külemi police dak-a teka sangshia liasü.

December 15 anepdang Khristan ka asüpila sentong ka agiba sülen tasü mangji arem, ajisüaka anogo ishika lir lokti jagi Khristanem dang tasü mangji tutetba sülen arongtsü atema takhangba agütsü.

Sarpanch, Rajman Salam-i December 15 nü tebu tasü mangji Khristanemi benshiba ama ali nung rema liasü, ajisüaka tasü ngnü Sukdu Ram leniba nung lokti tuluka aruba sülen parnoki, Panchayats (Extension to Scheduled Areas) Act nung ajemdaker tasü mangji arongtsü atema takhangba agütsütsü asoshi parnok dak temeden lir, ta ashi.

Parnokisa, tasü mang aremba tesemji yimdaklirtemi amangba tsü ngrem ka meyong ali lir, saka yangji Khristan ka arembaji ajanga onok mezü ngmeshiogo, ta ashi.

Iba sülen lokti jagi süng amshia tribal Khristanem dak azük aser police dak-a teka sangshia liasü. Mansu ta ser Khristan kabo tekolak kanga mejungi yirua hospital-i anir ao. Kasa tatalokba nung Pastor Siddhnath Chandra densema Khristan aika yiru.

Khristanemi ashiba agi, Kanker Lok Sabha constituency nungi BJP MP Bhojraj Nag-i ajungshia Khristanem anema inyaker.

Iba tatalokba sülen iba tesem nungji police aika lezmü ktsüogo aser curfew ozü ng benokba den külemi yimsü ng telungi tangar aittsü memelar.

Chhattisgarh nung mapang shia Khristanem tasü mang arem tsü memelar.

Taküm November 8 nüa Balod district kübok Jewartala yimdak arrshi küm 50 Khristan, Raman Sahu hospital ka nung süadokba sülen par kinü ngertemi tasü mangji arem tsü atema yimdaki bener aoba mapang yimdaklirtemi nokdang aser kangshia Hindu nunger yimya nung asüpila sentong agidakja liasü.

November 5 nüa arrshi küm 50 Khristan, Manoj Nishad Raipur yimti nung treatment tagidak mapang asü. Iba sülen par kibongi tasü mangji arem tsü atema Kodekurse yimdaki

bener ao saka yimdaklirtemi parnok nokdang. Yimdaklirtemi parnok dang, nenoki Khristan yimsü agizükogo, anungji yimdak tasü mang arem tsü atema nenok dak temeden mali, ta ashi.

Ajioda Khristan kibong jagi tasü mangji arem tsü atema anogo asemnü tashi tasü mangji bener yim balala sema senzü. Tesü sa tasü mangji Raipur yimti-i bener ao.

Taküm May ita nung Sanaud yimdak Khristan tetsür ka tasü mang arem tsü lia loktii nokdang. Police aser sub-divisional magistrate-i tasü mangji arem tsü melaaka yimdaklirtem jagi memela, tesü sa Khristan kibong jagi kilometer 30 shi pilar aliba Dhamtari-i bener oa tasü mangji arem.

Chhattisgarh kübok Bastar district kija nung Khristanem tasü mang arem tsü memelaba tatalokba 350 dak tali lir.

Taküm October ita tetenzüklen Chhattisgarh nung Kanker district kübok yim 22 nungi yimdaklir 400 dak tali adenshia Khristanem tasü mang arem tsü atema ali magütsütsü asoshi vote agütsütepa liasü. Senden nungji parnoki, Khristan yimsü dangi

ANO GO ABEN TSÜNGREM DEN

Kümdanga agizükba aser amshiba

Temeimbatem, Tsü ngremi asenok dang yamaji meim süra, ajangla asenokia medemer o medemer na meimteptsü tim" (I Yh. 4:11).

Temeimji tazü okba makai mesü ra nü kjidong mejangjai jangraba mapa ka masü. Asenok dang meimteptsü ozü ng tasen agütsü aser iba nungi jenzü ka alitsü merangra meimtepba alitsüji tamakoktsü. Temeimji ken atema jangra-a aitba (emotion) masü, saka ibai temulungjang telungtiba nung temerü ktiba mapa inyaktsü asoshi mulungtetba lir.

Ano temeimji anogoshia taküm yimya aser mapa nungi pilara pungmang tajung ka pungmanger sakba ama dang asütsü. Kolap naro ya kanga tajung aser ajaki iba ya meimer aser aginer saka yangia mesen alar, ita ya tepur tajung saka mepet aküm agi tongtangba ama temeimji tajung aser tanang saka tamajungbai raksatsür. Ibai kanga kümdanga agizüktsü aser amshitsüba mapa ka lir. Temeim nung mekü mdangra teti asoshi teraksa adoker.

Temeimi teshinem menema aliba teronem adokdakja merü ktettsür. Temeimi narongjakeri angashitsü sa tashi agi jembir. Temeimi tangar den lemsateptettsü sa takar kümdaktsür aser kaa alitsü sa inyakdaktsür.

MP nung High Court-i pei kidang Khristmas carol atentsü melar

December 21, 2025: Madhya Pradesh nung High Court-i, ki semdangba mapang nung Khristmas carol atentsü atema Khristanemi sorkar mesü ra police dang temelaba meshitsü menü ngdak, ta oshidang agütsüogo.

Khristmas benjung mongpu nung High Court-i iba oshidang agütsüba ajanga state nung nütsü ng ishika dang aliba Khristanem melung anisü ngzüker.

December 18 nü Madhya Pradesh High Court Indore Bench nungi Justice Jai Kumar Pillai-i, nija kidang Khristmas carol atentsü mesü ra tekülem kitem nung Khristmas carol atentsü atema ketdangsertem dang nungi temelaba meshitsü menü ngdak, ta metetdachtsü.

High court-i, yimsü dak sendakba sentongtem moapu nung agitsü atema dang ketdangsertem dang nungi jelia temelaba meshitsü la, ta metetdachtsü.

Jhabua nung Catholic Diocese nung public relation officer, putir Rockey Shah-i, "Pei kidang Khristmas carol atentsü temeden wazü ka ayuba atema onoki high court dang kanga pelar," ta metetdachtsü.

Jhabua district nung Khristanemi Khristmas mapang nung kibok sema Khristmas carol tena senzür, ajisüaka Arogotemi jelia anasa aliba police stations nem osang metetdachtsür atar.

AO OSHI ANGAZÜKDAK:

TANÜ ANGAZÜKTSÜBA OJANG



Tsüngren

(n) tetsüng taren-taren keter sayiplen jajaba tzü nung aliba shiruru (crab)

* Tsüngren ya long telong nung jenoka alir.

Tsüngrenbongsüng

(n) bongdang nung tsüngren tsünger shitaktsüba (fermented crabs)

* Asenokibo tsüngrenbongsüng lon kanga junga achir.

OLONG PAITEP # 7367

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- Nisung jenti - (5)
- Tsük rudenba - (5)
- Temzüng tesashi - (5)
- S _ _ _ i - (3)
- Nisung telemasa - (3)
- Anogoshi - (4)
- Ajanga aor - (4)
- Tsük rizüngdak - (3)
- Tebang nungi adokba - (3)
- Süngdong tatembangtiba - (5)
- Meputep - (5)

LANGTSÜNGLEN

- Tenük telong - (9)
- Committee dang ajar - (5)
- Yagi ki okdoker - (7)
- Yim lenmang - (5)
- Temoatsü keter meyipa aruba - (9)
- Kanga junga menemba - (7)
- Majinü - (5)
- Tzüma nung senzüba - (5)

OLONG PAITEP # 7366 TELANGZÜBA

TIPIEN :

- Telok, 4. Aluru, 6. Ozüng, 8. Emk,
- Kin, 10. Teti, 12. Süir, 13. Jen,
- Ola, 16. Talak, 17. Mazük.

LANGTSÜNGLEN :

- Tenükjang, 2. Luden, 3. Kiochtsü,
- Lenti, 7. Tajanzük, 11. Teronem,
- Sempa, 13. Jahaz.

NAI-A YA METETTER



England nung sandwich shop kibur kati ghonda 42 tashi Christmas ken khen dangi maneni atenba atema Guinness World Record ka angutsü merandangogo. Iba nisung ya Dave Purchase lir aser pai "longest marathon singing Christmas songs" otsü yanglutsü meranga liasü.

Dave Purchase-i ken 38 atenba nung "Jingle Bells" amala ken tejentem dena liasü aser pai ghonda 42 nung ken 684 tashi tena liasü.

Bengal Florican ozü tepseta achiba atema nisung 2 apu



Guwahati, December 21, 2025 (Agencies): Chirang district nung Bengal Florican ta asüba ozü khasetba, asoba aser achiba indang social media video ka kanga prokshiba sülen Chirang Police-i nisung asem puogo.

Iba video nung ajemdaker police-i bushitepa arudang Khungring nung Bigrai Musahary, Rekha Musahary aser Saon Basumatary nung maitsü jangjatetogo.

Police-i mita aodang ozü tashikang 20 aser Facebook nung upload asüba mobile

phone ngutetogo. Asüngdangtepa aodang ozüji Laopani area nung Rs 400 agi alizük ta angashir.

Iba dak sendakba nung Bigrai Musahary (30) aser Saon Basumatary (40) na puogo aser tena dang asüngdangya südar.

Bengal Florican ya alima nung tesama tia nung aliba ozütem rongnung ka lir. Sikhna Jwhwloa National Park aser Manas National Park nung Sisubari range tsüngda Khungring Forest Village nung ozüji akha ta bushitetogo.

Bengal Florican (Houbaropsis bengalensis) IUCN Red List nung Critically Endangered ta züluoka lir aser Wildlife (Protection) Act, 1972 nung Schedule I ajanga kümzüka lir.

Tai tonglokja alirtemi ozü asoba aser achiba indang video yanglua social media nung prokshiba ajanga public kanga jashidaktsü. Item video kanga prokshiba mapang wildlife activists aser conservation groups-i ola adok aser iba ajanga police-i mapa inyak.

Raja Raghuvanshi ken o: Sonam-i tai maliba kuli agütsür

Shillong, December 21, 2025 (Agencies): Indore nung alir Raja Raghuvanshi tepsetba ken o tuluba kümogo aser iba ya December 19, 2025 nü Raja kinungtsü Sonam Raghuvanshi-i Shillong Court nung la tai mali ta shia bail application ka benokba ajanga lir.

La kibong kümer alidang pelaa dang liasü aser la dak tai tongloktsüba ya tiyazü aser kuli kecha mali ta Sonam-i bail temepishiba nung shia lir.

Sonam-isa Raj Kushwaha den tesentaktep kecha maliasü aser pa den tedi ka ama dang lila aru ta shia lir.

Ajisüaka Raja tedi Vipin Raghuvanshi-i bail temepishiba magizüker. Sonam'er kibongi la yarir aser ozüngren nung kongshitsü meranger ta pai ashir.

Raja Raghuvanshi tepsetba ken o dak sendakba nung tang Sonam dena nisung pezü tepuokdak yua lir.

KAAC nung tim masüba aser ochimashi bushisüngdang asütsüla: Assam Congress

Diphu, December 21, 2025 (Agencies): Karbi Anglong Autonomous Council (KAAC)-i senotsü aika tim mesüi amshiogo aser ochimashi inyaker anungji bushisüngdang asütsüla ta Congress party-i tai tongloktsüogo.

District Media Chairperson Charisma Rongpipi aser Assam Pradesh Congress Committee (APCC) Media Spokesperson Mohan Rongpi nati Rajiv Bhawan nung osangbener den jembidang iba osang metetdaksü.

Sorkari 2016-17 aser 2025-26 mapang KAAC nung terenlok atema Rs 10,000 crore jungnua agütsü, ajisüaka tang tashi Karbi Anglong nung alirtemi terenlok mangu lir ta tenati ashi.

Council sasep nung ochimashi onsara inyaker aser

parnoki küm aika contractors nem sen magütsüi arur saka parnoki sakloker nembo agütsür ta Congress lennirtemi ashi.

KAAC ya sen yong yokdoker aser parnoki Karbi Anglong nung ali aser ali rongsentem company tem ket nung agütsür. Iba ya lisopurtem tarutsü asoshi timtem lir ta Mohan Rongpi-i ashi.

Kache Enterprise aser M/s Inglong Enterprise ajanga teti senotsü angur aser iba ajanga tendering aser billing process nung ashishitep adoker. Scheme balala kübok lenmang yanglutsü atema work orders adoka lir aser iba ya public sen tim mesüi agitsü atema inyakba lir ta Congress lennirtemisa metetdaksü.

KAAC-i tongti

mapatongtem Karbi Anglong nung maliba contractors nem agütsür. Parnoki local contractors senzüka yutsür aser lisopur lanurtem nem mapa inyaktsü maongka magütsür ta parnokisa ashi.

Ketdangpurtemi KAAC ya constitutional autonomous body ka ama masü saka private company ka ama inyaker. "M/s KAAC" tenüng amshia petrol stations nem online payments asüba kulitem onok ket nung lir aser iba ya public sen tim mesüi amshiba lir ta Congress lennirtemisa ashi.

Assam Chief Minister Himanta Biswa Sarma-i Chief Executive Member (CEM) mapa aser Council inyaksangshi atema bushisüngdang südaktsütsü akhanger ta parnokisa ashi.

Mokokchung Senso Kaketshir Telongjem

Lucky Draw Result

1st Prize	-	1694
2nd Prize	-	556
3rd Prize	-	2310

CONSOLATION PRIZES :
1) 1492 2) 3052 3) 1177 4) 487 5) 1639
6) 1758 7) 1359 8) 901 9) 2826 10) 908
11) 2785 12) 67 13)2787 14) 481 15) 1646
16) 108 17) 3092 18)2727 19) 800 20) 2732
21) 1933 22) 39 23)3409 24) 1363 25) 424

The rightful owner should come and claim their respective prices within 3 days after the result are declared.

Contact :- +91 6009413248, 9027039549

MOPUNGCHUKET BAPTIST AROGO

Quasquicentennial Benjungmong

Anogo : 27th - 28th December 2025



OMEN: KHRISTA AJANGA YIMJUNG

Tongti O Jembir

1. Rev. Tamsü Jamir, Executive Secretary, ABAM Impur
2. Dr. Sashinungla Pongen, Associate Professor, OTS Dimapur
3. Rev. Dr. A. Tali Ao, Academic Dean, CTC Aolijen

Jubilee Tezülor

1. Wb. Meyimangyang Ozüküm
2. Kr. Imcharenla Aier

Tekülem aser Tetushi Tanir

1. Wb. Enyar Jamir
2. Wt. Moakümla Jamir
3. Wt. Amongbi Jamir
4. Wb. Tiayapang Aier
5. Wb. Chubawapang Lemtur
6. Wb.Tzüiti

Washimong Saya Tanir

1. Wb. Mozen Aier
2. Dr. Butesen Ozüküm
3. Kr. Sentiben Jamir

Luchii (Dec) 27th Küptoknü

QQC NÜNGSHI LUNG (MONOLITH) LAPOKBA

Sentong

MAPANG: 4:30 PM

Telapoktsür:

REV. DR. WATI AIER

Emeritus Professor of Constructive Theology & Philosophy, OTS and Convener of FNR

1. Sentong Lenir : Dr. Chuba Aier, President, MTF
2. QQC Jubilee Sangdong : Tsüngrem Nükjang Yimti
3. Nüngshi Lung Lapok

TEMETETTSÜ:

1. Mapang telemsa yamai alitsü:
i) Onük Jembir - 25 minutes
ii) Lanlia, Ajungshi O, Ni Ya Shinür, Ayongzükbä O, Züngkümshidi - 7 minutes
iii) Tepela O, Salem O - 5 minutes
2. QQC Timsür MALT nungi nebu 60 agitsü.
3. Jubilee mapang traffic anepalur Mejensanger Lanur Mokokchung Town.
4. Iba sentong nung Mopungchuket Sensosanger, Anükapang aser Tetsü Tamu ajak pelashishia jaoker.
5. Sentong takok aser temoatsü asoshi sarasadema atadi.

Idakia reprangtetsü



@mopungchuketarogo

South Africa nung prangbong bena alirtemi nisung toku khaset

Johannesburg, Luchii/ December 21 (Agencies):
South Africa nung tavern ka Iba lendong ya Deobarnep nung nisung toku khaseta ano 1:00 ako meta atalok aser iba nisung 10 yirutsüba sülen tesem nungi nüburtem jena aoba lendong agütsür bushiba mapang lendong agütsüri tapi agi mapang lir. maneni akha, ta police-i ashi.

Johannesburg anasa Alima nung nisung timtiba Bekkersdal nung mejangjaba tepsetba linüktem rongnung nisung 12 brangbong bener gari South Africa ya ka lir. Taküm ana nung arur customer dak April aser September tsüngta injang khaloktsüba nung tebur anogoshi nisung 63 shi tepsetba

tenet aser tetsür ana asü, ta police-i ashi.

ama liasü ta police-i ashir.

Mangatettep adokba, auyaba aser nisung telok balala tsüngta azüdokshiba ajanga nisung tepsetba ya ataloker. Deobar aonung tepsetba nükjidong mejangjateti lir.

Iba lendong atalokdak deputy provincial police commissioner Maj-Gen Fred Kekana-i broadcaster Newzroom Afrika dang ashiba agi, iba azüdokshi lendong agütsür ya pistols aser AK-47 ka bener liasü aser parnok dang shingaia kecha mashi.

"Customer tem arua pelatepa aliba mapang item nisungtem aru aser injang khaloktsü," ta pai ashi.

Nisung ana iba tavern nungi jena aotsü merangba mapang khaset aser nisung ka taxi driver liasü, shiba passenger ka iba tesem anasai anir arutsüba mapang khaset, ta Maj-Gen Kekana-i ashi.

Yangji alir kati Newzroom Afrika dang Bekkersdal nung aonung prangbong ola angashiba ya tasen masü ta ashi.

"Mapa tamajung inyaker temi parnoki inyaknüba ama yangi inyaker," ta nisung kati ashi.

"Item prangbong ola ya nikongdang shia angashir... anü aiba den külemi prangbong ola angashitsü ta onoki meteta lir. Iba yagi nüburtem tetsübo nung alir."

South Africa nung oziung agi mela amshiba prangbong million asem shi lir, saka kasashi license makaba prangbong amshir, ta South African Gunowners' Association nungi Gideon Joubert ajanga ashir.

Tan ita tetenzüklena Pretoria anasa tanur ka densema nisung 11 khaseta liasü.

TEKÜLEM I

MAPANG 5:00 PM

Onük: KHRISTA DEN KÜM 125

Tejembir:
Dr. Sashinungla Pongen, Associate Professor, OTS
Kongki Atemer: Kr. Jungtiben Aier

Tekülem aser Tetushi:

1. Sentong Lenir : i. Wb. Kika Aier
ii. Kr. Akangsüngla Lemtur
2. Jubilee Lapok : Christian Education Ministry, MBA
3. Sarasademsü : Wb. I. Lanu Longkümer, Pastor Kubolong BA
4. Pela-a Agizükba : Wb. K. Bendang Lemtur, Deacon MBA
5. Longrar : Wt. K. Imtisenla Ozüküm
6. Khristar Benjungmong : Tanir i. Wt. Imtila
ii. Wt. Asangla
iii. Wb. Putimeren Ozüküm
7. Salem O : i. Rev. Dr. Akok Amer, Pastor Impur BA
ii. Wb. I. Kilen Longchar, Pastor Sungratsü BA
iii. Wb. P. Tenzük Jamir, Pastor Aosüngküm BA
8. QQC Kakat Saya : Pastor, MBA
9. Lanlia : Dr. N. Moa Jamir, Dimapur
10. Pa Nüng Sangang : Jubilee Choir, MST Mokokchung Town
11. Tsüngrem O
12. Tatem Sarasadem : Wb. B. Yashi Longkümer, Pastor Khanimu BA

TEKÜLEM II

Luchii (Dec) 28th Amungnü

MAPANG: 10:00 AM

Onük: KHRISTA AJANGA YIMJUNG

Tejembir:
Rev. Tamsü Jamir, Executive Secretary, ABAM Impur
Kongki Atemer : Kr. Rongnen Jamir

Tekülem aser Tetushi

1. Sentong Lenir : i. Wb. Imtimenba Jamir
ii. Wt. Moashila Aier
2. Lai Zünger Sarasademsü : Rev. I. Asenla Jamir, APW Aoyimkü BA
3. QQC Sangro : Kr. Moalen Jamir
4. Tepela O : i. Wb. Lanukümzü, Pastor Khar BA
ii. Wb. Senti Longchar, Pastor Longjang BA
5. Teimla : MST Kohima
6. Khonang Tetushi : Imyumeren Jamir, Tatar
7. Ajungshi O : Er. Atoba Imchen, EE NPWD
8. Ni Ya Shinür : Rev. Maong Lemtur, Director WEC-IMM, NEI
9. Jubilee Tenla : Wb. Meyipokym Aier, IFS (Retd.)
10. Ayongzükbä O : Jubilee Choir, Mopungchuket BA
11. Khrista Ajanga Yimjung
12. Tsüngrem O
13. Tatem Sarasadem : Wb. I. Toshi Longkümer, Pastor Alongchen BA

QQC Lokti Chiyong Sarasademsü
Rev. Dr. P. Tali Jamir

TEKÜLEM III

MAPANG: 4:30 PM

Onük: NENOK KÜ KULITEM

Tejembir:
Rev. Dr. A. Tali Ao, Academic Dean, CTC Aolijen
Kongki Atemer: Kr. Sayana Jamir

Jubilee Saya

Tekülem aser Tetushi

1. Sentong Lenir : i. Wb. Süpongasang Jamir
ii. Kr. Yapanginla Ozüküm
2. Sarasademsü : Wb. Tamsu Jamir, Pastor Longjang Compound BA
3. Tepela O : i. Wb. Bendang Lemtur, Pastor Longpa BA
ii. Wb. Wati Kichu, Pastor Chami BA
4. Pa Meim Kuli Südi : MST Chümoukedima
5. Züngkümshidi : Rev. Dr. W. Along Jamir, Director (Translation) BSI Bengaluru
6. Molungnen O : Wb. Lender Jamir, Convenor QQC Planning Committee
7. Salem O : Rev. Jongpong, Pastor Mopungchuket BA
8. Yimjung Otsü Tatem : Jubilee Choir, MST Dimapur
9. Tsüngrem O
10. Jubilee Shibang : MALT Kohima
11. Sarasademsü : Wb. Tenzük Jamir, Pastor Longjongkong BA

Washimong Saya

US-i Venezuela

tzüküm nungi

pilar tanabuba oil

tanker sota yuogo

Washington, Luchii/ December 21 (Agencies):
US-i, tawa Venezuela nungi apusoa aoba oil tanker ka sota yuogo, ta US Department of Homeland Security-i metetdaksü.

Iba ita tang agi tanabenbuba totzü bena aliba rong ka linük tzüküm anasa puogo.

Tir Donald Trump-i Mongolbarnü sangdong ka ajanga, tenokdangba agütsür aliba oil tanker tem Venezuela-i aotsü aser toktsür aotsü atema tenokdangba agütsütsü tetuyuba agütsüogo, ta ashiba sülen tang iba rong sota yuogo.

US-i iba jenjang agiba ya Venezuela-i auyaba ka aser kidnap asüba ka lir ta ashi. Venezuela-i Trump administration-i parnok indang alirongsen auyatsü meranger ta shia aitsüogo.

(Maneni tapak 8 nung...)

National School Games: Nagaland-i pre-quarternung tsükogo



Ranchi nung 69buba National School Games 2025-26 nung Nagaland state team tangokba noksa nung angur.

Kohima, Luchii/December 21 (TYO): Tang asaya aliba 69buba National School Games nung Deobarnü pre-quarter final nung Nagaland state U-17 football (Girls) team-i goal 0-4 agi Haryana mekoki liasü.

Iba asayamung ya School Games Federation of India (SGFI) 2025-26-i ayongzüka Khelgoan Stadium, Ranchi, Jharkhand nung asayadar.

Deobarnü tanga asaya ka nung Nagaland team-i

Uttarakhand goal 4-1 agi koka pre-quarter atema qualify süa liasü.

Ajsüaka parnoki pre-quarter final asaya nung Haryana team mekochteti tsükogo.

Uttarakhand den asayaba mapang Rokovino Yongo, Zangloa Konyak, Zemloi Konyak aser Lhuveku nungeri Nagaland team atema goal kaka idakja liasü.

December 20 nü asaya nung Nagaland team-i Vidya Bharati

goal 8-0 agi ayong ayonga koka liasü.

Iba asaya nung Nagaland team nungi asayar Zemloi T Konyak-i goal ti idaktsü aser kasa mapang nung Lhuveku, Rokothono Thami aser Rukukholo Shijoh nungeria goal kaka idakja parnoki asaya ayong ayonga akok.

Nagaland team ya team manager P. George Vizo aser coach Kevilebei nati anir oa asayaogo.

3buba Nagaland Inter-Open Volleyball Tournament January it asayatsü

Kohima, Luchii/December 21 (TYO): 3buba Nagaland Inter-Open Volleyball Tournament taruba küm January 13 aser 14nü asayatsü.

Iba asayamung ya Kohima district kübok BKK Kezo Town-i ayongzüka Ground, Kezo Town nung asayatsü.

Asayamung ayongertemi ashiba agi, asayamung nung shilem agitsü atema taah sen 3000 asütsü telemteba agiogo,

aser team tem züngoksemtsü atema tatembangbuba anogoji January 10 asütsü ta metetdaksüogo.

Iba asayamung ya tetsür aser tebur naprongla atema asütsü. Iba asayamung nung takok anguba team (tetsür aser tebur naprongla) nem senpet sen 50,000 aser runners-up nem sen 30,000 agütsütsü. Maneni semifinal tonga asayaba team tema senpetsütsü ta asayamung

ayongertemi metetdaksüogo.

Team sen senpet agütsüba den bendenloksema jurila senpet Best Spiker aser Best Setter na nem agütsütsü.

Asayamung nung shilem agitsü jangrartemi team züngoksemtsü aser asayamung dak sendakba nung osang tejangjaba agitsü atema item number +91 9862522745 mesüra +91 7349655210 nung tongteprateptsü metetdaksüogo.

Australia-i Test ana asayatsü anunga lia Ashes kokogo

Luchii/December 21, 2025 (Agencies): Deobarnü tasembuba Test asaya nung Australia-i England run 82 agi koka Ashes asayamung kokogo. Iba asayamung nung asaya ana asayatsü anunga lia parnoki takok nguogo.

Anogo pongububa asaya akoktsü atema run 435 angutsü nüngdaka asayaba England-i run 352 dang yangluteta asaya makok. Asaya nung Mitchell Starc-i wicket 3 agi aser Scott Boland-i tatembangbuba wicket agia liasü.

Pert aser Brisbane na nung wicket ti agi tamakok anguba sülen England tang agi asaya tasembuba nung tamakok nguogo. Parnok tang agi Ashes pezübuba atonga tamakok nguogo, aser Australia nung Test 18 asayaba asaya 16 nungbo tamakok nguogo. Taküm iba asayamung nunga ano asaya ana asayatsü anunga lir, saka parnok tamakok nguatokogo.

"Onok nükjidong ka yur aru saka majangzüktet. Asaya

makokba atem kanga mepelar," ta England captain Stokes-i ashi.

"Parnoki temaba jenjang nung onok dang nungi tajungba asayaogo. Pezübuba innings nungbo onoki junga asayar ama bilemer," ta paisa shisem.

Tasembuba Test pongunübuba asaya akoktsü atema run 228 nüngdaka England batting amen tenzük aser all-rounder Will Jacks o wicketkeeper Jamie Smith nati asaya tenzük. Pongunübuba England team asayar trok out sür asaya tenzük liasü.

Asaya nung Jacks tetsüng pelepba ajanga kanga timtema minute 40 tashi asaya, saka iba sülen tzülü aruba ajanga asaya anentsüsa aküm.

Tzünglu aruba atema England nung fan tem pelatep saka tzünglu tatsüka dang aru aser anü apu tenzük. Tena senteper run 50 yanglu.

Ball tasen agi asaya tenzükba sülen Smith-i Cummins aser Starc napronglai aonba ball kanga junga züka asaya.

Asaya akoktsü atema run

150 dang nüngdaka aliba mapang Starc-i aonba ball ka pai azüktsü merangdang pa Cummins-i catch out sütsü. Pai run 60 yanglu.

Jacks-i kanga süngjema asaya aser tailender Carse den partnership ka yanglua asaya, shibai out mesüi run 39 yanglua liasü.

Tena senteper run ishika yanglua asaya akoktsü atema run 100 dang nüngdaka akümiba mapang Starc-i aonba ball ka Jacks-i azüktsü merang saka junga mezüksi-i Labuschagne-i kanga junga ajebzüka out sütsü.

Iba sülen Jofra Archer-i Starc indang ball ka swip asütsü merang koba Jake Weatherald-i ajebzüka out süja liasü. Asaya nung tatembangbuba wicket ya Boland-i agi. Pai Tongue out süja liasü.

Iba asaya atema Australia nung wicketkeeper Alex Carey nem Man of the Match agütsü. Pai mezüngbuba innings nung run 106 aser tanabuba nung run 72 yanglu.

Pakistan-i U19 Asia Cup final nung India run 191 agi kokogo

Luchii/December 21, 2025 (Agencies): Deobarnü Dubai nung Under-19 Asia Cup final nung Pakistan-i run 348 yangluba sülen parnoki iba asaya ya ayong ayonga kokogo. Run arishiba mapang India team-i over 26.2 nung run 156 dang yanglua Pakistani asaya run 191 agi kokogo.

2013 küm India den külemi Men's U-19 Asia Cup akokba sülen Pakistan team-i tang mezüngbuba iba asayamung kokogo.

Asaya akoktsü atema run 348 nüngdaka aliba mapang India nung opener temi junga asayatsü nüngdaka liasü. India nung asayartemi asaya kanga junga tenzük aser mezüngbuba over ana nung run 32 yanglu. Ajsüaka over 4.1 tashi nungbo asayar 3 out süatok. Opener Ayush Mhatre aser Vaibhav Sooryavanshi na aser number 3 Aaron George nung kanga kara out süatok.

Iba sülen India asoshi asaya akoktsü atema sayatenya ka nüngdaka liasü, saka shingaia partnership yanglua masayatet aser mapang shia asayartem

out süatok. India asoshi partnership tajungtibaji Deepesh Devendran aser Kishan Singh na tsüngda last wicket partnership liasü. Tenati ball 18 nung run 36 yanglu.

Pakistan nung bowler temi tetenzük nungi ball kanga junga aon aser parnok rongnungi Fast bowler Ali Raza-i wicket 4 agi kong Ayush Mhatre, aser Vaibhav Sooryavanshi na out sütsüba densema lir. Kasa mapang nung Mohammad Sayyam, Abdul Subhan, Huzaifa Ahsan nungeri wicket anana agia liasü.

Mezüngbuba innings nung Pakistan nung opener Sameer Minhas-i century ka yanglua team asaya kanga junga tenzüksü aser parnoki asayar 8 out sür run 347 yanglua liasü.

Minhas-i iba asaya nung ball 113 nung run 172 yanglua par team takok dangi ani. Group stage nungbo parnoki India team run 90 agi mekoki liasü.

Sameer Minhas nemsas Player-of-the-Match aser Player-of-the-Series award agüja liasü.

BENDANGLI OSANG : Tapak 7 nungi...

US-i Venezuela tzüküm nungi...

"Iba inyakyim ya memerenshibo metoktsütsü," ta Venezuela sorkari sangdong ka ajanga metetdaksüba den, UN Security Council aser tanga multilateral agency aser linük balala sorkar nem tashishiba ka agütsütsü parnok tebilemba lir ta shiogo.

Iba ita tetenzüklen ama US Coast Guard-i anir meita aoba mapang iba rong sota liasü. Iba rong ya specialised tactical team kati achaayanga liasü aser apuba mapang international tzüyim nung senzüa liasü.

Department of Homeland Security Secretary Kristi Noem, shibai Coast Guard achaayanger pai X nung minute tenet talang video ka lemsatepogo.

Video nung US indang helicopter tem Centuries ta zülü aliba rong ka anenba sayuogo. Iba rong ya Panama wako songa aliba rong ka lir, saka taoba küm pongu tashi iba rong ya Greece aser Liberia wako songer senzüa liasü.

Rong ya US Treasury-i tenokdangba agütsür aliba

rongtem indang list nung mali.

Hopta ishika tsüngda US-i Caribbean Sea-i sepaitem tali yokogo aser temesepba mozü shibelenba Venezuela nung indang rongtem maka arudar. Iba mapa parnoki nisung 100 shi tepsetogo.

Rongtem nung temesepba mozü bena liasü ta US-i kecha kuli magütsü aser item rongtem amakba atema Congress-i military ya kanga junga asadanga arudar.

Trump administration-i, Cartel de los Soles ta nüngja agütsür kiralongrar telok ka len aniba atema Venezuela tir Nicolás Maduro aitsüogo, koba pai magizüki arudar.

Trump-isa, pei agitsü, temesepba mozü shibelentsü, meimchir shibelentsü, nisung tepsettsü aser pur aotsü atema auyaba totzü amshiba atema Maduro-i aniba sorkar aitsüogo.

Tanabuba rong apuba sülen Defence Secretary Pete Hegseth-i X ajanga, US-i ozüng alema inyaksangshirtem nokdangtsü asoshi jenjang tapet agitsü ta shiogo.

BILEMDANGANG

"Shiba tajungba mesüra tamajungba tereprang, nai tajungtiba agütsür magütsür aji nü sasa asüngdangang."